

Dekano di Orden di Abogado Mr. Karel Frielink:

E FORMA KU POLITIKONAN TA ATENDE KU OTRO TA UN MENASA PA ESTADO DI DERECHO

WILLEMSTAD.- E forma kon polítikonan ta atendé ku otro, esta e forma di ekspresá nan mes ku otro ta muestra di debilidad i un menasa pa estado di derecho, asina Dekano di Orden di Abogado, mr. Karel Frielink, a bisa.

Durante su disertashon na okashon di instalashon di tres hues pa Korte Komun, Frielink a mustra riba vários aspekto preokupante ku tin den desaroyo di seno gubernamental, sigur pa e forma kon polítikonan ta atendé ku otro.

Esaki ta di kuater biaha ku Frielink tin e honor di hiba su disertashon na okashon di instalashon di hues(nan) i defakto e último biaha komo Dekano di Orden di Abogado.

Frielink a trese dilanti ku for di su promé disertashon, el a ekspresá su preokupashon, miéntras ku atraves di aña su preokupashon a bira mas grandi.

Na e okashon aki Frielink a bisa ku si e mester skohe un tema sentral pa su disertashon, anto lo ta sin duda e forma di ekspresá krtika riba hende

i situashon, pa un grupo chikí di hende ku ta fanátiko di griteria i zundramentu, loke ta un menasa pa estado di derecho.

Frielink a trese dilanti ku e griterianan aki no a hasi influensia riba su persona.

Pero echo ta ku tin personanan ku polítikamente tin responsabilidatnan grandi i ku tin funshonnan di liderazgo, kaminda nan mester ta ehèmpel pa komunidad.

Netamente e hendenan aki ta hasi nan mes kulpabel na e forma di ekspresá aki i ta di lamentá.

Esaki ta un muestra di debilidad, na opinion Frielink.

E tipo di ekspreshonnan aki lo no pone ku Frielink lo no ekspresá su krtika. E biaha aki el ekspresá su krtiká atrobe, ku énfasis riba e derecho estatal.

E forsa di reglanan di derecho ta sintá den su ehèkushon, miéntras ku e reglanan aki a haña nan lugá den e fundeshi.

E violashon di reglanan ta un asunto partikular, kaminda gobièrnu via di hurisdikshon ta buska



Dekano di Orden di Abogado mr. Karel Frielink (na man drechi) durante su disertashon.

solushon pa disputanan. E sistema polítiko mester protehá e komunidad kontra di diktadura.

Den Statút di Reino tin e posibilidat pa den situashonnan ekstremo via di Reino tuma desishonnan.

Pero den un sistema di derecho madurá, problemanan mester keda atendé den kas.

Kaminda polítikonan no ta logra solushoná e problema, mester tin un instituto ku tin e

outoridatnan nesessario ku por tuma sierto desishonnan.

Akinan ta pensa riba un korte konstitushonal, na unda den un forma fásil un parlamentario por aserká i haña klaridat.